

## MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micori illa rafue  
(Mt 3.1-12; Lc 3.1-9, 15-17; Jn 1.19-28)*

<sup>1-2</sup> Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie lluamona, Juan Bautista micori llofuelena lloste. Iena suillamona, Jesucristo eniruemo ite rafue tainede. Iena nano lloiacadicue. Isaías micori cuete: “Ero, o uicodo cue rafuena lloiena, damiena oretaiticue” Jusiñamui raite.

<sup>3</sup> Jofue iñenanomo damie jidai-jidaillana cacadicue. Naimie lloste: “Cai Nama biite. Naimie naiso atona raise fino” lloste.

Naisona lloste; iadedi naimie uaina naimaci feiñollena, naimaci comeciai marena finuana ñaite.

<sup>4</sup> Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaifia, naimacimo lloste:

—Omoi jeacinona fainonocaida, Jusiñamui dibeimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

<sup>5</sup> Diga comini naimie micori dine jai jaisoidimaci. Jerusalémona, nana Judeamona, nana Jordán fueмона jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

<sup>6</sup> Juan micoridi camello itiraiai ie nilla iniroina jítade. Igoi iena ie moilligaina jítade. Fioduaina rite. Ciifona mete. Jamai rana guite. <sup>7</sup> Cominimo lloste:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue.

<sup>8</sup> Jusiñamui ðibeimo omoï illamona, jinui diga omoïna bautizadicue; ia naimie bia, naimie ðibeimo omoï jaillamona, Jusiñamui Joreñoona omoïmo itataite.

*Jesús bautizaja rafue*

*(Mt 3.13-17; Lc 3.21-22)*

<sup>9</sup> Jordán ðine Juan micori ñia ia, Galileamona, Nazaretmona naimie ðine Jesús bite. Nainomo Jesúdi Juan bautizaga. <sup>10</sup> Bautizaja mei, jinuimona billanona, ieconi mona bojodena ciode. Jusiñamui Joreño, ucuçi isoi, naimie emodomo ana billana ciode. <sup>11</sup> Monamona Jusiñamui llote:

—Cue isiruiga Jitodio. Ori iobidicue.

*Jesúna Taife ramo faia rafue*

*(Mt 4.1-11; Lc 4.1-13)*

<sup>12</sup> Jesús bautizaja mei, Jusiñamui Joreño jofue iñenanomo naimiena uite. <sup>13</sup> Comini nainomo iñede. Difai ocainaiái itimaci. Nainomo cuarenta ðigarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue*

*(Mt 4.12-17; Lc 4.14-15)*

<sup>14</sup> Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. <sup>15</sup> Llote:

—Jusiñamui birui omoïna sedaacade. Ie cominina omoï jaillena birui jitaide. Jusiñamui ðibeimo illena, omoï jeacinona fainonocaida, omoï comeciai iuaina meido. Bie rafuena mai omoï iino.

*Ie llofueoicaigano jaillena, Jesúdi nagaamagamiëna fetua rafue*

*(Mt 4.18-22; Lc 5.1-11)*

<sup>16</sup> Jiáiruido Galilea railla jorai fuemo Jesús macaritemo, menamiëna ciode. Naga ie ama iaïmaiai. Damie Simón.

Jiáimie Andrés. Lloijina fairáima iáimaiaí. Iese jaca naie iáimaiaidí maijuuidíiaímaiaí. <sup>17</sup> Iáimaiaimo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaina birui ocabitomico; iadedí cominina oitomico, cue díbeimo naimaci illena.

<sup>18</sup> Iena cacajanona, ieconi iáimaiaí lloijina fainonocaida, naimie diga jaidíiaímaiaí. Ie llofueganona jaillena, jaidíiaímaiaí. <sup>19</sup> Lliai baí Jesús jaidemo, jiaie menamiéna ciode. Naga ie ama iáimaiaí. Damie Jacobo. Jiáimie Juan. Iáimaiaí moodí Zebedeo. Botemo iáimaiaí lloijina sigaidíiaímaiaí. <sup>20</sup> Jesús iáimaiaína uaidote, ie llofueganona jaillena. Ie maijirainí diga iáimaiaí mooná fainonocaida, botemona ari billanona, Jesús diga jaidíiaímaiaí.

*Jesúdí* Janaba anamo itimie jillotaja rafue  
(Lc 4.31-37)

<sup>21</sup> Baí jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofue. <sup>22</sup> Moisés micorí llogacino llofuerainí isoi llofueñede. Illaíma uai isoi naimie llofuiá jira, nainomo ite cominí naimie llofuiamona rajicaidímací. <sup>23</sup> Janaba anamo illamie nainomo ite. <sup>24</sup> Jesús llofuiána cacaita, Janabadí iimana ado cuirioitate:

—Odí Nazaret ie Jesús. ¿Bue ñeacadío cai diga? Caina duere finuaíbidío. Ona uíñoticue. Odi Jusíñamui ie mare fetocamiedío.

<sup>25</sup> Jesús naimiéna lletade:

—Lliícai. Naimiémona oni jai.

<sup>26</sup> Janaba naimiéna docaitajanona, ado cuirioillanona, naimiémona oni jaide. <sup>27</sup> Iena ciuanona, nana nainomo itino rajicaidímací. Coniníri siadotímací:

—¿Niese ite? Bimie jiaie uaido llofujete. Janabamo naimie llua mei, iimamona Janaba oni jaide. Janaba Jesús uaina iinote.

<sup>28</sup> Iemona nana Galilea eniruemo Jesús mameci are soride.

*Jesús Pedro jifaiñona jillotaja rafue*

*(Mt 8.14-15; Lc 4.38-39)*

<sup>29</sup> Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiaide. Jacobo, Juan diga jiai fo jaide. <sup>30</sup> Ie facaise Simón jifaiño duide. Abi cuaride. Nainomo itino Jesúmo naiñaiño duil-lana lloste. <sup>31</sup> Iena cacajanona, naiñaiño dine jaillanona, Jesús naiñaiño onollina llinote. Naiñaiñona naidacaitade. Ieconí abi cuarilla fainonocaide. Guille finuanona, ie jofomo itinona ecade.

*Jesúdi ailluena duidinona jillotaja rafue*

*(Mt 8.16-17; Lc 4.40-41)*

<sup>32</sup> Navuida, jitibicaidemo, Jesús dine comini ailluena duidinona atidimaci. Janaba anamo itinona jiai atidimaci. <sup>33</sup> Nana Capernaum comini naie jofó nasemo ofidimaci. <sup>34</sup> Jesúdi diga duiconona ailluena duidinona jillotate. Ailluena comini Janaba anamona jillotate. Naimiena jananiai uiñua jira, Jesús naimaci ñaiana rairuide.

*Galileamo Jesús llofuia rafue*

*(Lc 4.42-44)*

<sup>35</sup> Ie areruido nia monaiñenia, Jesús casillanona, Capernaumona comini iñenanomo Jesús jaide. Nainomo Jusiñamuimo jiide. <sup>36</sup> Monaia, casidemo, jofomo Jesús iñena jira, Simón, ie nabaiñiai diga, Jesúsna jenuaide.

<sup>37</sup> Baillanona, raite:

—Nana comini ona jenodimaci.

<sup>38</sup> Jesús uai ote:

—Jiaie nairaiiaí dine mai cai jailli. Nainomo llofueiacadicue. Ie jira Capernaumona jino biticue.

<sup>39</sup> Nana Galileamo Jesús jaide. Judúuai ofiracuaimo llofuecana jaide. Ailluena cominimona jananiaina oni oretate.

*Jesúdi efonaitimiena jillotaja rafue*

*(Mt 8.1-4; Lc 5.12-16)*

<sup>40</sup> Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiaadedi, cuena jillotaredio.

<sup>41</sup> Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadícue. Mai o jillo. <sup>42</sup> —Ieconí naimie jillode. <sup>43</sup> Ie facaise Jesús naimiena oretaiacanano, naimiemo riire llote:

<sup>44</sup> —O jilluana bumo lloñeno; iadedi Jerusalémo Jusiñamui jofomo Jusiñamui dîga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo fecá.

<sup>45</sup> Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

## 2

*Jesús tisitaitimiena jillotaja rafue*

*(Mt 9.1-8; Lc 5.17-26)*

<sup>1</sup> Nîgarui illanona, Capernaumo Jesús dane abido ride. Comini iena fidianona, <sup>2</sup> ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofujete. <sup>3</sup> Cominina Jesús llofuetemo, naimie dine nagaamagamie ie biiramo biide tisitaitimiena atidimaci.

<sup>4</sup> Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econuano, Jesús ecimo naimiena ie biiramo biide diga, rao diga, ana ñuitadimaci. <sup>5</sup> Iena Jesús cñuanona, tisitaitimie jilluana naimaci ñnuana Jesús uiñote. Tisitaitimiemo llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

<sup>6</sup> Nainomo itinomona damierie Moisés micori llogacinona llofueraini nainomo raidimaci. Comecina facadimaci: <sup>7</sup> “¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. <sup>8</sup> Naimaci comeciái facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? <sup>9</sup> Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacailanona, o biira ferinocaida, mai macari” cue lloia, cue uai siñonana uiñoitomoi. <sup>10</sup> Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimiemo lloiticue: <sup>11</sup> “Mai naidacai. O biira ferianona, o jofomo mai jai”.

<sup>12</sup> Iese naimie raillamona, tisitaitimie jillode. Naidacaida, ie biira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobilacinona fecadimaci. Raitimaci:

—Bie isoide siño comena jaca cioñedicai.

*Jesúdi Levína fetua rafue*  
(Mt 9.9-13; Lc 5.27-32)

<sup>13</sup> Jiairuido jorai fuemo Jesús dane jaide. Ailluena comini naimie dine ofillanona, naimacina llofujete. <sup>14</sup> Llofuia mei, Jesús bai macaritemo, Leví raillamiena

ciode. Levídi Alfeo jito. Gobierno ucube ouillanomo naimie maijiuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. — Naidacaida, Jesús diga jaide.

<sup>15</sup> Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. <sup>16</sup> Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. <sup>17</sup> Iena cacajano, Jesús llote:

—Ecairedinodi médoca jitañedimaci; ia duidinodi médoca jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci. Jusiñamui díbeimo mareuidinona uaibiñedicue; iadedi maraiñedino uaibiticue. Omoimona maraiñedino diga nabairiticue; ia naimacina uaibiticue.

*Jesúmo comini guiñenana jicanua rafue*

*(Mt 9.14-17; Lc 5.33-39)*

<sup>18</sup> Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai

jaidimaci; ia o llofueoicaigano jaca guitimaci. ¿Bue ñelena cai einamací rafuedo jaiñedimaci?

<sup>19-20</sup> Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>21</sup> Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. <sup>22</sup> Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifineite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai —lote.

*Sábadoruimo Jesús llofueoicaigano maijia rafue  
(Mt 12.1-8; Lc 6.1-5)*

<sup>23</sup> Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci. <sup>24</sup> Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijñidicai; iadedi trigona naimaci tijiamona, caimona jai maijñidimaci. Iese cai abimo jeacinona jai finodimaci.

<sup>25</sup> Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaiie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga,



Jusiñamui jofomo fo jaide. <sup>26</sup> Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. <sup>27</sup> Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. <sup>28</sup> Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

### 3

*Jesúdi onollina idisarodimiena jillotaja rafue  
(Mt 12.9-14; Lc 6.6-11)*

<sup>1</sup> Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. <sup>2</sup> Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode. <sup>3</sup> Onollina idisarodimiemo Jesús llote:

—Cue ecimo mai bai bi.

<sup>4</sup> Jesús nainomo itinomo jicanote:

—¿Ñie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuená birui omoi meineiadedi, birui marañede rafue finodomoi. Sábadoruimo, ¿nie isoide rafue finuana rairuidomoi?

Comini dinena uai oñedimaci. <sup>5</sup> Naimie uaina naimaci ññoñena jira, riicaillanona, Jesús naimacimo erodate. Duidimiemo llote:

—O onolli mai oni ñuita.

Iena oni ñuitajamona jillode. <sup>6</sup> Iena ciuanona, fariseuai jino jaidimaci. Naimiena meinellena, illaïma Herodes ðibeimo itinona baillanona, naimaci diga coniniri siadotimaci.

*Jorai fuemo Jesúdi* ailluena cominina llofuia rafue

<sup>7</sup> Naie nairaimona jorai fuemo Jesús, ie llofueoicaigano diga, oni jaide. Galilea railla eniruemonona ailluena comini naimie ðine bitimaci. Judeamonona jiaino bitimaci. <sup>8</sup> Jerusalémonona, Idumeamonona, Jordán ruicafabellemonona, Tiro jinofemo ite eniruemonona, Sidón jinofemo ite eniruemonona ailluena bitimaci. Nana naimie siño finoca rafuena cacajanona, naimiena cioacadimaci. <sup>9</sup> Comini naimiena meetasii raillanona, ie llofueoicaiganomo daje botemo naimie jaillena eenogana llote. <sup>10</sup> Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemonona naimie illa bote eenuana jitaide. <sup>11</sup> Jananiai anamo itino Jesúna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodío. <sup>12</sup> —Ia Jesús naimiena naimaci lluana rairuide.

*Jesúdi* ie doce llofueoicaiganona fetua rafue

*(Mt 10.1-4; Lc 6.12-16)*

<sup>13</sup> Naie facaise anedumo Jesús jaide. Ie jitaillano ðiese naimie ðine uaidote. Naimie ðine billa mei, <sup>14</sup> doce ðigamienna fetode. Naimie diga jaicabillena, naimacina fetode. Ie rafuena lollena, naimacina oretaiacade. <sup>15</sup> Janaba anamo itinomona Janabana oni oretallena, ie uai naimacimo ite. <sup>16</sup> Iese mameciredimaci: Simón; naimie mameci jiaicidi Jesús jítaca Pedrona. <sup>17</sup> Jacobo,

Juan; iaimaiaí Zebedeo jito iaimaiaí. Jiaie mameci iaimaiaína Jesús jonete Boanergesna. Naie mameci oni dobaiñuamona mona guruama. Iciriruilla jira, iese mamecirediiaimaiaí. <sup>18</sup> Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. <sup>19</sup> Judas Iscariote micori; naimiedi Jesúna gaitatitimie.

*Fariseuai* Jesúna jeare ñaia rafue

(Mt 12.22-32; Lc 11.14-23; 12.10)

<sup>20</sup> Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide.

<sup>21</sup> Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci. <sup>22</sup> Jerusalémóna Moisés micori llogacinona llofueraini naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate —raitimaci.

<sup>23</sup> Naimaci raillana naimie cacajanona, naimie dine Jesús naimacina uaidote. Llote:

—Janaba díbeimo Beelzebú illamona, dama ie abina oretanide. <sup>24</sup> Ero, daje isoi comeciaina lloiñenamo daje nairai facañenia, danomo maijinidimaci. Oni jaidimaci.

<sup>25</sup> Daje isoi comeciaina lloiñenamo daje jofomo itino facañenia, danomo jainaiainidimaci. Oni jaidimaci. <sup>26</sup> Ie isoide. Beelzebú uaido jananiaina omoi llua isoi cue oretaia, Janaba ie díbeimo itino diga jai nabairiñede. Iemona naimie comini danomo iñeitimaci. Ie uai ieconi saite.

<sup>27</sup> Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia,

cominina jillotanidicue. Naimie afemo cue illa jira, iena finoredicue. <sup>28</sup> Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; <sup>29</sup> iadedi naimiedi ie Joreñoa jeare ñaiacinona jaca dotañeite. Jusiñamui iena jaca feitañeite —llote.

<sup>30</sup> —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini*

*(Mt 12.46-50; Lc 8.19-21)*

<sup>31</sup> Jesús comini naimie dine rillanona, naimie diga ñaiacanano jino naidaidimaci. <sup>32</sup> Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

<sup>33</sup> Jesús dinena uai ote:

—¿Bu cue ei? ¿Bu cue amatiai?

<sup>34</sup> Naimie ecimo itinomo erodajanona, llote:

—Jadi, cue ei, cue amatiai. <sup>35</sup> Jusiñamui jitaillacinona finodimie cue amana, cue miriñoa, cue eina. Imaci ua cue cominina.

## 4

*Jesúdi trigona judaidimiēna llua rafue*

*(Mt 13.1-9; Lc 8.4-8)*

<sup>1</sup> Jiairuido jorai fuemo dane jaillanona, ailluena comini naimie dine ofillamona, Jesús naimacina llofue. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. <sup>2</sup> Ailluena rafuena naimacina llofue. Raite:

<sup>3</sup> —Omoí fueollena, bie rafuemo raise cacarei. Damie trigona judaiaide. <sup>4</sup> Naimie judaiaimona, naisomo

janore iduai juide. Naimie bai jailla mei, silliñiai iena guisai bitimaci. Ie jira sicoñede. <sup>5</sup> Nofiemmo jiaie iduai juide. Nainommo enirue raise iñede. Sicode; iadedi enirue raise iñena jira, <sup>6</sup> raise jainañena jira, ecasillamona duide. Ie jira llisiñede. <sup>7</sup> Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede. <sup>8</sup> Mare eniruemo jiaie iduai juide. Sicode. Llisillamona danademo treinta diga llisillana ote. Jiainamona sesenta diga llisillana ote. Jiainamona cien diga llisillana ote. <sup>9</sup> Omoi jeforena jira, raise fueollena, cue lluamo cacarei. Iena iino.

*Jesús ie como lloga rafuena llofuia rafue*

*(Mt 13.10-23; Lc 8.9-15)*

<sup>10</sup> Ailluena cominimona jailla mei, naimie diga jaisoidinodi, ie doce llofueoicaigano diga, Jesúmmo ie llofuiana jicanotimaci. <sup>11</sup> Uai ote:

—Jusiñamuidi omoina ie sedaacana rafuena jai uiño-tade. Jaie iena uiñoñedomoi. Jiaie cominina iena nia uiñoñañede. <sup>12</sup> Ie jira bie isoidicinodo naimacimmo lloticue. Cue siño finoca rafuena ciodimaci; iadedi iena naimaci iinoñena jira, uiñoño jaitimaci. Cue llofuiana jamai cacadimaci; iadedi naimaci iinoñena jira, raise cacaiñedimaci. Uiñoñedimaci. Jusiñamui dibeimmo naimaci jaiacaiñena jira, Jusiñamui naimaci jecinona oni dotañeite. Iena feitañeite. <sup>13</sup> Cue como llofuia cinona omoi raise cacaiñenia, dane cue llofuia, iena jiai raise nibai cacaiñeitomoi; <sup>14</sup> ia iena omoina llofueiticue. Trigona judaidimiedi Jusiñamui rafue lloraima isoide. <sup>15</sup> Dajerie iduai naisommo juide. Dajerie comini comeciái naie naiso isoidimaci. Jusiñamui uaina cacadimaci; ia Taife naimaci comeciáimmo cacaja uaina iinoñañede. <sup>16</sup> Jiaie iduai nofiemmo juide. Dajerie comini comeciái naie nofie isoidimaci. Jusiñamui uai nano naimaci cacai, iena caimare feiñotimaci. <sup>17</sup> Nofiemmo riga

iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. <sup>18</sup> Jiaie iduai eecuai illanomo juide. Naie iduai sicua mei, iena eecuai ñbaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; <sup>19</sup> iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. <sup>20</sup> Jiaie iduai mare eniruemomo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi* lamparina ñaia rafue  
(Lc 8.16-18)

<sup>21</sup> Jorai fuedo Jesúdi cominina nia llofuede:

—Jai uneca lamparin jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomomo rainade. <sup>22</sup> Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci. <sup>23</sup> Omoi jeforena jira, raise fueollena, cue lluomo cacarei. Iena ñno.

<sup>24</sup> 'Cue lluomo raise cacarei. Omoi cacaja diese Jusiñamui omoina uiñotaite. <sup>25</sup> Iena omoi ñnoia, Jusiñamui omoina cacoite. Omoina uiñocana jaitaite. Jiaimie iena janore cacajamona, iena ñnoñenia, Jusiñamui naimiena faifitaite.

*Jesúdi* Jusiñamui ie cominina sedaacana llofua rafue  
<sup>26</sup> Jesús llote:

—Jusiñamui díbeimo comini jailla rafuena nia lloiticue. Naimie díbeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. <sup>27</sup> Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede; <sup>28</sup> ia eniruemonana nano sicode. Monailla mei, lliside. Iemonana naicuai comuide. <sup>29</sup> Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

*Jesúdi* mostaza ido llua rafue  
(Mt 13.31-35; Lc 13.18-19)

<sup>30</sup> Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. <sup>31</sup> Jiaie rafuedo iena omoimo lloiticue. Damie mostaza idona rillamona, naiemona eo aillue riarana sicode. Mostaza ido eo janorede; <sup>32</sup> iadedi sicua mei, eo aillue riarana jaillamona, ie onogaillaie jegairiena jira, icairo anamo manaídinomo silliniñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>33</sup> Naie isoide rafuiaido Jesúdi Jusiñamui ie cominina sedaacana rafuena cominimo llote. <sup>34</sup> Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofujete.

*Jesúdi* jorai baguana llicaitaja rafue  
(Mt 8.23-27; Lc 8.22-25)

<sup>35</sup> Ailluena comini llofuia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

<sup>36</sup> Cominina fainonocaida, botemo naimie jai illamona, naimie llua isoi, oni jaidimaci. Jiaie botes jiaie jaide.

<sup>37-38</sup> Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinaillamona, Jesúna casitatimaci. Raitimaci:

—Maestro, ¿niese itio inioilla? Caina cano. Jai buisaidicai. Corobaisaidicai.

<sup>39</sup> Naimie casillano, aifina lletade. Jinui baguana llicaitade. Ieconi aifi llicai. Bagoñede. <sup>40</sup> Ie llofueoicaiganomo jicanote:

—¿Bue ñellena jacinaitomoi? ¿Niese cuena raise inoñedomoi?

<sup>41</sup> Uai oñeno eo rajicaidimaci. Coniniri ñaitimaci:

—Bimiiedi ¿nie isoidimie? Aifi naimie uaina inote. Jorai naimie uaina jiai inote. —Bai jaillanona, ruica dine ridimaci.

## 5

*Jesúdi* Gadara railla eniruemo illa rafue

(Mt 8.28-34; Lc 8.26-39)

<sup>1</sup> Ruica dine naimaci ridemo, Gadara railla eniruemo sijidimaci. <sup>2</sup> Botemona ari Jesús jaidemo, naimie dine damie bite. Naimiedi Janaba anamo itimie. <sup>3</sup> Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. <sup>4</sup> Diga icaiño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. <sup>5</sup> Nagarui nofie motomo ite. Anedumo jaisoide. Cuiricuirisoide. Dama ie abina nofici diga jaidode. Iese naimie isoide. <sup>6</sup> Nofiemona Jesúna cianona, aisicana Jesús dine bite. Naimiena sedallena, ie caiñici ifodo ana rainadate. <sup>7-8</sup> Jesús llote:

—Janaba, bimiemona oni jai.

Janabadi imana ado llotatate:



—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

<sup>9</sup> Jesús Janabamo jicanote:

—¿O mameci bu?

Uai ote:

—Aillosiedicai.

<sup>10</sup> Bie illanomona naimacina oretañellena Jesúmo duere jicanotimaci. <sup>11</sup> Naie facaise nainomo ite anedumo ailluena chanchuai itimaci. <sup>12</sup> Chanchuai abimo naimaci jaillena Jesúmo duere jicanotimaci. <sup>13</sup> Jesús ñinena:

—Jee —raite. Ieconi ñima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

<sup>14</sup> Iena ciuanona, chanchuai sedaraini naimaci nairai ñine aisicana jaidimaci. Naie rafuena llocana jaidimaci. Ie jira ñiga comini jaide, naie rafuena raise fidillena.

<sup>15</sup> Jesús ñine naimaci ridemo, jaive Janaba anamo illamiena Jesús ecimo raillana ciodimaci. Naimie ñiroina jai jítade. Naimie jai uairicoñede. Iena ciuanona, Jesúsna jaciruitimaci. <sup>16</sup> Naie rafuena ciodino jaive Janaba anamo illamie jilluana llotimaci. Chanchuaimo suide rafuena jiai llotimaci. <sup>17</sup> Naie enirue itinodi Jesúmo naimaci eniruemona oni jaillena duere jicanotimaci.

<sup>18</sup> Botemo Jesús jaiacania, jaive Janaba anamo illamie Jesúmo jicanote, naimie ñiga jaillena; <sup>19</sup> ia Jesús raite:

—Dama ite. O nabaiñiai ñine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

<sup>20</sup> Ie jira oni jaide. Nana Decápolis railla eniruemona Jesús nana naimiemona finoca rafuena llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue  
(Mt 9.18-26; Lc 8.40-56)*

<sup>21</sup> Ruica dibeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, <sup>22</sup> Jairona mameciredimiedi Jesús dine bite. Naimiedi judfuaí rafue ofiraco sedarima. Jesúmo duere jicanollena, ana bitadate. <sup>23</sup> Duere jicanote:

—Cue jisa jai fioldaiacade. Cue jofomo cue diga bi, o onolli naiñaiño o jonellena, naiñaiño jilloillena.

<sup>24</sup> Iena cacajano, ie llofueoicaigano diga, naimie diga Jesús jaide. Ailluena comini Jesúmo ñaijillanona jaidimaci. <sup>25</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca díaide. <sup>26</sup> Diga manorainimona duere sefuide. Jilloñede; ia fodo jaide. Nana ie ucube jiai fuite. <sup>27</sup> Jesús duidinona jilluana naiñaiño fidiama, jinafo dinena billanona, naimie iniroina jetade. <sup>28</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade. <sup>29</sup> Ieconí diailladi fañonocaide. Ie abi jilluana naiñaiño jai uiñote. <sup>30</sup> Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

<sup>31</sup> Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

<sup>32</sup> Raise uiñollena, Jesús ie ecimo itinomo erodate. <sup>33</sup> Duidiñaiño ie jilluana uiñua jira, Jesús dine jacirucana bite. Naimie uicomo ana bitadajanona, nana naiñaiño mo ite rafuena llote. <sup>34</sup> Naiñaiño Jesús llote:

—Ñoo, cuena o inua jira, jai jillodio. Mai marena o jai. O duicomona jai jillobidio.

<sup>35</sup> Naiñaiño diga Jesús nia ñaitemo, Jairo jofomona jiaño bite. Jairomo llote:

—O jisa jai fioldate. Maestrona ñaidoño.

<sup>36</sup> Iena cacajano, Jairomo Jesús llote:

—O comeci jarire iñeno; ia cuena nia iino.

<sup>37</sup> Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. <sup>38</sup> Jairo jofomo rillanona, nainomo itino eecuinaillana cacade. Failliñailana cacade. <sup>39</sup> Jesús fo jailla mei, nainomo itinomo jicanote:

—¿Niese itomoi eecuinailla? Cuemona naiñaiño fiodañedesa. Jamai inide.

<sup>40</sup> Iena cacajano, naiñaiño jai fiodaite uiñuamona, Jesúri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide. <sup>41</sup> Naiñaiño onollina llinocaida, judúuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

<sup>42</sup> Ieconí jilluanona naidacaide. Jai jilluano macarite. Naiñaiñomo doce años jai ite. Nana nainomo itino ieri eo rajjicaidimaci.

<sup>43</sup> —Bumo bie rafuena lloñeno —naimacimo Jesús llote. Guillena naiñaiñona eajana jiai llote.

## 6

### *Nazaretmo Jesús illa rafue (Mt 13.53-58; Lc 4.16-30)*

<sup>1</sup> Naie illanomona Jesús oni jailla mei, ie llofueoicaigano diga Nazaretmo ride. <sup>2</sup> Rilla mei, sábadoruimo nainomo ite ofiracomo llofue. Iena cacajanona, nainomo itino rajjicaidimaci. Raitimaci:

—¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie. <sup>3</sup> Naimiedi amederaíma. María jito. Ie amatiáidi Jacobo, José, Judas, Simón. Naimie miriñotiaídi

cai motomo jiai ite. —“Cai comena naimie ite” raillanona naimie uaina jamaidimaci.

<sup>4</sup> Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iñoñedomoi.

<sup>5</sup> Ie muidona nainomo siño rafuena eo finonide. Damierie duidinona jetajamona, naimacina jillotate; <sup>6</sup> ia naimaci iñoñenari rajjicaide. Ie mei diga nairaimo Jesús llofuecana jaide.

*Jesúdi* ie llofueoicaiganona oretaja rafue

(Mt 13.53-58; Lc 4.16-30)

<sup>7</sup> Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Ie rafuena lollena, jiaie illanuaimo naimacina menamierie oretaiacade. <sup>8</sup> Raite:

—Ailluena rana uiñeno. Omoi abi riidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno. <sup>9</sup> Zapatona jítajano jai. Abi omoi meidolle iniroina uiñeno. <sup>10</sup> Nie nairaimo omoi jai, daacomo omoi ri. Naie nairaimo omoi ille dinori, daacomo omoi i. <sup>11</sup> Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

<sup>12</sup> Jesús naimacimo llua mei, jaidimaci.

—Omoi jeacinona fañonocaillanona, Jusiñamui díbeimo omoi comeciai iuai meiduana omoi jai — llofuecana jaidimaci. <sup>13</sup> Janaba anamo ite cominimona Janabana oredimaci. Duidino abimo farena gia mei, naimacina jillotate.

*Juan Bautista micori fiodailla rafue  
(Mt 14.1-12; Lc 9.7-9)*

<sup>14</sup> Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

<sup>15</sup> Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jae lloraima micori jai jillode.

<sup>16</sup> Jesúna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

<sup>17-18</sup> Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

<sup>19</sup> Ie muidona Herodías dinena Juan Bautista micorina jearuite. Naimiena meinetaiacade; <sup>20</sup> ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori lluana cacade. Iena gaide; ia iena raise cacaiñede. Ie muidona Herodías naimie micorina meinetanide; <sup>21</sup> ia ja muidomo naiñaiño sedallirui ride. Herodes cumpleños ie rafuena finode. Ailluena illaicominina ie rafuemo uaidote. Eo ucuberedinona jiai uaidote. <sup>22</sup> Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. <sup>23</sup> Illaïma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

<sup>24</sup> Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

<sup>25</sup> Herodes dine raire abido billanona, llote:

—Juan Bautista ifogí bandejamo ja jonecaida, cuemo ine.

<sup>26</sup> Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacaiñede. <sup>27</sup> Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. <sup>28</sup> Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade. <sup>29</sup> Iena fidianona, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaina ecaja rafue*

*(Mt 14.13-21; Lc 9.10-17; Jn 6.1-14)*

<sup>30</sup> Jesús llofueoicaigano abido bia, Jesúmo nana naimaci finoca rafuena llotimaci. <sup>31</sup> Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

<sup>32</sup> Ie muidona botedo comini iñenanomo dani jaidimaci.

<sup>33</sup> Ailluena comini naimaci oni jaillana cioidimaci. Naimacina uiñuamona, diga nairaiaimona aisicana jaidimaci. Jesús nia riñenia, uicodo ie jaillanomo ridimaci.

<sup>34</sup> Jesús sijianona, ailluena cominina ciode. Naimacina

sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue. <sup>35</sup> Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.

<sup>36</sup> Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

<sup>37</sup> Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaudio.

<sup>38</sup> Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

<sup>39</sup> Iena cacajano, cominimo raitie illanomo dajerise ana raillena Jesús llote. <sup>40</sup> Naimaci cien digamierie ana raisite. Jiaino cincuenta digamierie ana raisite. <sup>41</sup> Naie cinco llomeniconona, naie mena lliciai diga, Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade.

<sup>42</sup> Nana guillanona monidimaci. <sup>43</sup> Monillamona, fiebide guillena iraidimaci. Doce cirigaiaimo oruitatimaci.

<sup>44</sup> Cinco mil iñiaí diese guitimaci. Naimaci ainiaí, imaci uruiaí diga, jiaí guitimaci.

*Jesús jinui emododo macarilla rafue*

*(Mt 14.22-27; Jn 6.16-21)*

<sup>45</sup> Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. <sup>46</sup> Cominina facadua mei, aneduaimo dane jaide, Jusiñamui diga ñaillena. <sup>47</sup> Jitibicaidemo,

nainomo dama ite. Ie llofueoicaigano jorai motomo jai itimaci. <sup>48</sup> Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; <sup>49</sup> ia naimiena naimaci ciuanona, comecina facadimaci: “¿Bu joreño caimo billana ciodicai?” <sup>50</sup> Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoi joreñonicaiño. Cuesa. Jaciruiño.

<sup>51</sup> Botemo Jesús jaide. Ie facaise aifi lliicaide. Ieri eo rajicaidimaci. <sup>52</sup> Janore guillemona ailluena cominina naimie ecajana jaive cioidimaci; ia naimie uai siñonana nia raise uiñoñedimaci. Naimiena nia raise iñoñedimaci.

*Jesúdi* duidinona Genesaret eniruemo jillotaja rafue  
(Mr 14.34-36)

<sup>53</sup> Ruica dine jaillanona, Genesaret railla eniruemo ridimaci. Nainomo sijidimaci. <sup>54</sup> Botemona ari jaidemo, nainomo itino Jesúna uiñotimaci. <sup>55</sup> Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuidimaci. <sup>56</sup> Diga nairaiimo naimie jaide. Nie nairaimo Jesús ria, naimaci illano motomo duidinona atisite. Jilluana jitaaidimaci. Ie iniroi fueda jetallena naimiemo duere jicanotimaci. Nana naimie iniroina jetatino diese jillodimaci.

## 7

*Jesúdi* comini comeciaina ñaia rafue  
(Mt 15.1-20)

<sup>1</sup> Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci. <sup>2</sup> Jesús llofueoicaiganomona damierie naimaci



isoi guiñenana ciotimaci. <sup>3-5</sup> Fariseuai dinena Jesúmo jicanotimaci:

—¿Bue ñellena omoi llofueoicaigano cai einamaci rafuedo jaiñedimaci? Naimaci guiacania, naimaci onolli cai einamaci llua isoi, raise jocoñedimaci. Ie jira cai abimo jeacino finodomoí.

Iese jicanotimaci, naimaci einamaci rafuedo naimaci jailla jira. Maraiñede rafue naimacimo suiñellena, iese ailluena judúuai jaidimaci. Naimaci guiacania, naimaci einamaci llua isoi, onollina diga icaiño jocuano, guitimaci. Mercadomona bia, naimaci einamaci llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoía, Jusiñamuimona mare. Iese cai finoñenia, Jusiñamuimona maraiñede. Naimie caína duere finoite”. Jearede rafue naimaci abimo oñellena, iese finoidimaci.

<sup>6</sup> Jesús uai ote:

—Mareuidinona abi caitauidinodomoí. Isaías micori jaie omoína raise llote. Naimiedi Jusiñamui lluaña cuete: Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicai” llotimaci.

Jamai ñaitimaci. Naimaci comechai cue díbeimo raise iñede.

<sup>7</sup> Cue uai itena, jamai comini llucacina naimaci llofuecabilja jira, tainona cuena sedadimaci

cuete. <sup>8</sup> Isaías micori llua isoi itomoí. Jusiñamui llogacinona fainonocaida, omoi einamaci rafuedo jaidomoí.

<sup>9</sup> ¿Bue ñellena nana Jusiñamui llogacinodo jaiñedomoí? Omoi einamaci llogacinodo jaidomoí; iadedi nana Jusiñamui llogacinodo raise jaiñedomoí. <sup>10</sup> Moisés micori jaie llote: “O moo uai iñuanona, naimiena cano. O ei uai iñuanona, naiñaiñona cano. Ie moori jeare ñaitimie, ie

eiri jeare ñaitimie meinelle”. <sup>11-12</sup> Iese Moisés micori llotē; iadedi omoi einamacī llotimaci: “Jusiñamuimo cai ucubena cai fecajamona, cai moona, cai eina jai canonicicai”. <sup>13</sup> Iese omoi finocabilla jira, omoi einamacī llogacinodo omoi jaillamona, Jusiñamui uaina jamaid-omoi. Bie isoide rafuedo jaca jaidomoi.

<sup>14</sup> Fariseuai diga iese llua mei, naimie ecimo ailluena comini dane ofillanona, naimacimo llotē:

—Iena raise omoi uiñollena, cue llua mo cacarei.

<sup>15</sup> Omoi einamacī isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi. <sup>16</sup> Omoi jeforena jira, raise fueollena, cue llua mo cacarei. Iena iino.

<sup>17</sup> Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci. <sup>18</sup> Uai ote:

—¿Niese cue llua jiai nia cacaiñedomoi? Nie isoide ra guitomoina, omoi comeciaino jeare iñede. <sup>19</sup> Omoi comeciaino jaiñede; ia omoi jebemo jaide. Ie mei omoi abiaimona jino bite.

Jesús llua mo, nana guille radi mare uiñotici. <sup>20</sup> Jesús llotē:

—Omoi comeciai jearena jira, jearede rafuena finocabidomoi. <sup>21</sup> Omoi comeciai jearena jira, jeare comeciaina facacabidomoi. Omoi aiñede riño diga icabitomoi. Omoi iniñede iima diga icabitomoi. Fiiricabitomoi. Cominina meinecabitomoi. <sup>22</sup> Jiai comini rana nicidocabitomoi. Jearede rafuena finocabidomoi. Iena ebiruitomoi. Jifuericabitomoi. Abina uradoicabitomoi. Jiaie comini joreña jeare ñaicabitomoi. Abina iedocabitomoi. Ebena jaicabitomoi.

<sup>23</sup> Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

*Jesúdi* judío iñaiñoñediñaiñoña jillotaja rafue  
(Mt 15.21-28)

<sup>24</sup> Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jitaiñede; ia iena janonide. <sup>25-26</sup> Ie facaise judío iñaiñoñediñaiño daño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianona, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. <sup>27</sup> Judúaiñedinona naimie canoñenana naiñaiño uiñol-lena, naiñaiñoño Jesús llote:

—Uruiai guillamona jiconiaina ecadicaidena, maraiñede. Uruiai nano ecadicaí.

<sup>28</sup> Naiñaiño ñinena uai ote:

—Jii, maestro; iadedi jiconiaidi uruai guillamona fiebide guillemona guitimaci. —Iese llote; ia jiaie rafuemo comecina facade. Uruiaína llote; iadedi judúuaimo comecina facade. Jiconiaina llote; ia judúuaiñedinomo jiai comecina facade. Comecina facade: “O cominimo o rafue duide; ia cai Namana o illa jira, ñibai o rafue caimo janore duide”.

<sup>29</sup> Jesús uai ote:

—Raise llotio. O jofomo mai abido jai. O jisamona Janaba oni jaide.

<sup>30</sup> Naimie llua isoi jofomo jaide. Ie jisa biiramo biidena ciode. Janaba naiñaiñoñomona oni jaillana jai uiñote.

*Jesús jefona cacaiñedi*mienna jillotaja rafue

<sup>31</sup> Tiro railla eniruemonona Jesús oni jaide. Jaillanona, Sidón railla eniruemo jaide. Decápolis railla eniruemo

jiai jaide. Ja muidomo Galilea railla jorai fuemo ride. <sup>32</sup>Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. <sup>33</sup>Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade. <sup>34</sup>Jusiñamui dine monamo eruaita, naimiena duenaillamona, jafaicina faite. Judíuai uaido naimiemo llote:

—¡Efata! —Oni dobaiñuamona: “¡Ecoricai!” raite.

<sup>35</sup>Ieconí ie jefodí ecoricaide. Jai raise cacade. Jai raise ñaite. <sup>36</sup>Cominimo:

—Bimie jai jilluana bumo lloñoeno —Jesús diga icaiño llote; ia naimie uaina iinoñedimaci. Iena llocana uitimaci. <sup>37</sup>Naimieri eo rajicaidimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

## 8

*Jesúdi* cuatro mil iñiaina ecaja rafue

(Mt 15.32-39)

<sup>1</sup>Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

<sup>2-3</sup>—Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenailla jira, naimacina canoiacadicue.

<sup>4</sup>Jicanotimaci:

—¿Niese naimacina bene ecaiticai? Jofue iñenanomo iticai.

<sup>5</sup>Jesús jicanote:

—¿Niga llomenico omoimo ite?

Uai otimaci:

—Siete.

<sup>6</sup> Comini ana raïllena Jesús llote. Naie llomeniconu uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. <sup>7</sup> Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote. <sup>8</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>9</sup> Nainomo cuatro mil iñiaï guitimaci. Naimaci ainiaï, imaci uruiaï diga, jiai guitimaci. <sup>10</sup> Guilla mei, cominina naimaci jofuemo Jesús orede. Ie llofueoicaigano diga, botemo jaïllanona, Dalmanuta raila eniruemo jaide.

*Fariseuai* comini Jesúsno siño rafuena finuana jicanuano billa rafuena

(Mt 16.1-4; Lc 12.54-56)

<sup>11</sup> Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioïllena, Jusiñamuina siño rafuena finota.

<sup>12</sup> Sunaïllanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

<sup>13</sup> Ie llua mei, naimacimona oni jaidimaci. Ie llofueoicaigano diga, botemo dane jaïllanona, ruica dine Jesús jaide.

*Jesús* siritate rana llofui rafue

(Mt 16.5-12)

<sup>14</sup> Ruica dine rilla mei, Jesús llofueoicaigano llomenicon feillana uibiñotimaci. Naimacimo daje llomenico ite.

<sup>15</sup> Iena naimie uiñuamona, naimacimo Jesús llote:

—Fariseuai siritate ramona abina rairui. Illaíma Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

<sup>16</sup> Jesús iese llua jira, iena naimaci raise cacaiñena jira, dani coniniri siadotimaci:

—Llomenicon caí atiñena jira, caímo iese llote.

<sup>17</sup> Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuena ñinoñedomoi? Cuemo siño uai illana nia raise cacaiñedomoi. <sup>18</sup> Uisiredomoi. Jeforedomoi. ¿Niese

cue navui siño finoca rafuemo comeaiña facañedomoi? <sup>19</sup> Navui cinco mil iñiaí cinco diga llomenicon guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

<sup>20</sup> Jesús llote:

—Jiaícaíño cuatro mil iñiaí siete diga llomenicon guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

<sup>21</sup> Jesús dinena jicanote:

—¿Niese cuena nia raise ñinoñedomoi? Siño uai cuemo illana nia raise ñinoñedomoi.

*Jesús uisínidimiena jillotaja rafue*

<sup>22</sup> Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisínidimiena atide. Naimiena jilloitallena, naimiena jetallena, Jesúmo jicanote. <sup>23</sup> Iena Jesús cacajanona, ie

onollina llinuanona, nairai illa jinofemo uisinidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

<sup>24</sup> A eruaillanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

<sup>25</sup> Ie uisina Jesús dane jetade. Iemona oni erocaillanona, jai jillode. Jai raise ciode. <sup>26</sup> Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñoeno; ia nainomo jaiñoeno o jofomo mai abido jai.

*Pedro Jesúsna llua rafue*

*(Mt 16.13-20; Lc 9.18-21)*

<sup>27</sup> Cesarea Filipino eniruemo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>28</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

<sup>29</sup> Jesús dane jicanote:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci

<sup>30</sup> Jesús iena bumo lluana rairuide.

*Jesús ie fiodaillena llofuia rafue*

*(Mt 16.21-28; Lc 9.22-27)*

<sup>31</sup> Ie facaise ie llofueoicaiganona ie duere sefuillena llofuate. Llote:

—Cai judíuai illaicomini cuena eo duere fínoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

<sup>32</sup>Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

<sup>33</sup>Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

<sup>34</sup>Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue díbeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue díbeimo naimie iite. <sup>35-37</sup>Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jaia, jaca faifiñeite. Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite. <sup>38</sup>Birui ite comini Jusiñamuina jitaiñedimaci. Naimiena jai faínonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

## 9

<sup>1</sup>Omoimo unacina lloticue. Omoimona dajerie nia fiodaíñeitomoimo, illaimana ebire cue bairellena cioitomoí.



*Jesús abi meidoquilla rafue  
(Mt 17.1-13; Lc 9.28-36)*

<sup>2</sup> Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiaie llofueoicaiganona uñede. Nainomo rilla mei, naimaci uicomo naimie abi meido- caide. <sup>3</sup> Naie daciaño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. <sup>4</sup> Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaimaia. <sup>5</sup> Iaimaia jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

<sup>6</sup> Eo jaciruilla jira, naimie ñaia rafuena raise uñoñoeno jamai ebena ñaite. <sup>7</sup> Ie facaise uillie billamona, naimacina ibaide. Uilliamona Jusiñamui llote:

—Bimie cue isiruiga Jito. Naimie llamo cacareillanona, iena ñno —llote.

<sup>8</sup> Ieconí oni erodajanona, dama Jesúna ciodimaci. Jiaínona cioñedimaci.

<sup>9</sup> Anedumona bitimacimo, naimacimo Jesús llote:

—Omoi ailli cúa rafuena bumo lloñoeno, cue fiodail- lamona cue jillua ñnori. <sup>10</sup> Jesús llua isoi finodimaci. Iena bumo lloñedimaci; ia fiodaillamona naimie jillu- ana naimaci raise nia cacaiñena jira, iemo começina facadimaci. <sup>11</sup> Naimiemo llotimaci:

—Moisés micori llogacínona llofueraini birui raicabitimaci; “Elías raillamie dane biite. Ie mei cai Jilloitaraima biite” raitimaci. Jusiñamuimona o billana ñnoticai. Odi cai Jilloitaraimana ñnoticai. Odi cai Jilloitaraimadiomo, ¿bue ñelli iese raitimaci?

<sup>12</sup> Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llollena. Jusiñamui ðibeimo naimaci illena, comini imaci comeciai meiduana llote. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. <sup>13</sup> Elías isoidimie jai bite; iadedi Jusiñamui facaina lloraïma micori jaie cuega isoi, naimaci jitailla jira, naimiena jai meinetimaci.

*Jesúdi* Janaba anamo itimiena jillotaja rafue

(Mt 17.14-21; Lc 9.37-43)

<sup>14</sup> Ie jiaie llofueoicaigano ðine Jesús abido ria, nainomo ailluena comini itimacimo ride. Moisés micori llogacinona llofueraini ðinena ie llofueoicaigano uaina uaitaside. <sup>15</sup> Jesús billana comini ciuanona, jacinaisidimaci. Naimiena feñollena, naimie ðine aisida jaidimaci. <sup>16</sup> Moisés micori llogacinona llofuerainimo Jesús jicanote:

—¿Ñiese cue llofueoicaigano uaina uaitatomoi?

<sup>17</sup> Uai oñedimaci; ia cominimona ðamie uai ote:

—Maestro, Janaba anamo cue jito illa jira, o ðine naimiena atidicue. Cue jito Janaba anamo illamona ñainide. <sup>18</sup> Nagarui Janaba bille ðiese, naimiena eniruemo uaitate. Iemona fueði mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraini bie rafuena, o llofueoicaigano ðiga, uaina uaitatimaci.

<sup>19</sup> Iena cacajanona, Jesús ie llofueoicaiganomo llote:

—Cue uai siñonana ñia ñinoñedomoi. Omoi ðiga are iticue. Raise omoi ñnollena, ¿ñie ðinori omoi ðiga iiticue?

Naie ðuidimie moomo llote:

—O jito cue ðine mai ati.

<sup>20</sup> Naie urue Jesús dine atianona, Janaba naimiena naillitate. Iemona urue eniruemo uaide. Jabi-jabide. Fue mullede. <sup>21</sup> Jesús dinena naie urue moomo jìcanote:

—¿Ñie ðinori o jítodì bie isoi ite?

Uai ote:

—Naimie uruenamona. <sup>22</sup> Janabadi, diga icaiño iraimo usillena, naimiena uaitate. Corobaillena, diga icaiño jìnuimo jìai uaitate. Janaba oni o oretarenia, cocona duenaillamona, cocona cano.

<sup>23</sup> Jesús uai ote:

—“O oretarenia” raitio. Ero, o jito jillotaredicue. Cuen a ñinoia, o jito jilloite.

<sup>24</sup> Naie urue moo ieconi llote:

—Ona ñinotìcue. Raise nia cue ñinoñenia, cuena raise ñinota.

<sup>25</sup> Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie dine dane biñeno.

<sup>26</sup> Ado cuirioillanona, naimiena eo riire naillitajanona, Janaba oni jaide. Iemona naie urue fiodaitimie isoi ero-caide. Naimiena ciuanona, nainomo itino raitimaci:

—Naimie jai fiodaite; <sup>27</sup> —ia Jesús naimie onollina llinocaida, naimiena a naidanete.

<sup>28</sup> Iemona oni jaillanona, damie jofomo Jesús naillì ria, naimiemo ie llofueoicaigano anado jìcanotimaci:

—¿Bue ñellena Janabana oni oretanidicai?

<sup>29</sup> Jesús uai ote:

—Jusiñamuimo omoi jìamona, naimiena raise omoi ñnuamona, bie isoide Janabana oretaredomoi. Naimiena omoi raise ñinoñena jira, bie uruemona Janabana oni oretañedomoi.

*Jesús ie fiodaillena dane llofuia rafue  
(Mt 17.22-23; Lc 9.43-45)*

<sup>30-31</sup> Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo llote:

—Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

<sup>32</sup> Ie llofueoicaigano iena raise cacaiñedimaci; ia naimiemo iena jicanuana meiruitimaci.

*Jesús ie llofueoicaigano moto imiëna ille rafue*

*(Mt 18.1-5; Lc 9.46-48)*

<sup>33</sup> Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

<sup>34</sup> Uai oñedimaci. Naimaci moto imiëna illena, naisodo siadocana bitimaci. Meiruillanona, uai oñedimaci.

<sup>35</sup> Naimie ana rainadaja mei, ie ecimo naimacina uaidote. Raite:

—Omoi moto imiëna bu iacania, jamai bue isoidimiena naimie illa. Omoi muillaimana naimie jailla isoilla.

<sup>36</sup> Iena naimaci raise uiñollena, nainomo ite cominimona daje urue bai jainanocaida, naimaci motomo naimiëna jonete. Naimiëna menioita, naimacimo llote:

<sup>37</sup> —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiëna feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

*Jesúdi ie díbeimo itinona llua rafue*

*(Mt 10.42; Lc 9.49-50)*

<sup>38</sup> Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

<sup>39</sup> Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite. <sup>40</sup> Cai dibeimo itimiedi cai facaisena ite. <sup>41</sup> Ero, cuemo omoi duillamona, omoina bu janore canoia, Jusiñamuimona ibana feiñoite. Omoimo ñibai jamai jinuina fecaite; iadedi omoina naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

*Jesúdi* jeacinona finoñenana llofuia rafue

(Mt 18.6-9; Lc 17.1-2)

<sup>42</sup> Jesús nia llofue:

—Cuena como iinotina jeacinona finotaiacadimie iena finoñellena, naimie cimaiomo aillue nofici maianona, joraimo corobaillena naimiena dotacadena, mare. <sup>43-48</sup> Biena ñaiticue. Nie isoide rafue omoina jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iramo omoi jaiñellena, jeacino finoñeno. Naimacimo ite aiai fioidañena jira, naie irai jaca duiñenamona, nainomo itino jaca duere sefuitimaci.

<sup>49</sup> 'Ero, birui omoi duere sefuillamona, cue cominina jai jaidinona uiñoiticue. <sup>50</sup> Guille caimaretallena, sal mare; iadedi ie caimano jai iñenia, iena dane caimaretañedicai.

Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

## 10

*Jesús* iima ie aina dotaja rafuena llofuia rafue  
(Mt 19.1-12; Lc 16.18)

<sup>1</sup> Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica díbeimo jaide. Ailluena comini naimie dine ofillamona, naimie llofueuilla isoi, naimacina llofue. <sup>2</sup> Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

<sup>3</sup> Uai ote:

—¿Niese Moisés micori llote?

<sup>4</sup> Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñona dotaite”.

<sup>5</sup> Jesús uai ote:

—Jusiñamui uaina raise omoi iinoñena jira, Moisés micori iima ie aina dotajana rairuiñede; <sup>6</sup> iadedi nano dofoconi iese iñede. Enirue finua facaiseconi Jusiñamuidi come iaimaiaina finode. Iimana finode. Riñona jiai finode. <sup>7</sup> Ie jira Jusiñamuidi jaie llote: “Ie ai diga illena, iima ie moona fainonocaite. Ie eina jiai fainonocaite. Ie ai diga illamona, menade comedi daamiēna jai jaide” llote. <sup>8</sup> Menade come jai daamiēna jai ite. <sup>9</sup> Jusiñamui iese iaimaiaina itataja jira, iima ie aina dotajana rairuidicue. Riño ie inina dotajana rairuidicue.

<sup>10</sup> Jofomo ie llofueoicaigano diga, naimie nailli illanona, naimiemo bie rafuena jicanotimaci. <sup>11</sup> Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. <sup>12</sup> Ie inina fainonocaillanona, jiaimiena nie riño uamona, naiñaiño jeacino jai finode.

*Jesúdi* naimie dine uruai billana jitailla rafue  
(Mt 19.13-15; Lc 18.15-17)

<sup>13</sup> Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaiddimaci. “Naimacina raise cano” ie Moomo lollena jitaiddimaci. Ie llofueoicaigano iena rairuidimaci; <sup>14</sup> iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiño. Cuen a bie isoi innotinodi Jusiñamui cominidimaci. <sup>15</sup> Bie uruai abina iedoñedimaci. Einamacimona jamai bue isoidimaci. Naimaci isoi bu inenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

<sup>16</sup> Naie uruai dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

*Ucuberedimie* Jesús diga ñaia rafue  
(Mt 19.16-30; Lc 18.18-30)

<sup>17</sup> Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

<sup>18</sup> Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

<sup>19</sup> Moisés micori llogacinuaina inocana jai. Jaie cuete: “Comena meineño. O aiñede riño diga ineno. Fiiño.

Jiainiena o llogidoia, tainona lloñeno. O moo uaina ñno. O ei uaina ñno<sup>19</sup>.

<sup>20</sup> Uai ote:

—Maestro, uruena cue illa facaisemona nana bie llogacinuaina ñnoticue.

<sup>21</sup> Jesús dinena naimiemo eruaiñlanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiaacania, omo ite raruiaina feca. Naie ucubena dueredinomo feca. Cueno o ñnuamona, monamo ñco jaca itio. Cue llofuegamiena o illena, mai cue diga bi.

<sup>22</sup> Iena cacajano, naimiedi sunaite. Eo aillue ra naimiemo illa jira, iena naimie feacaaiñena jira, sure jaide. <sup>23</sup> Naimie jailla mei, ie llofueoicaiganomo eruaiñlanona, naimacimo llote:

—Ucuberedinodi Jusiñamui cominina jaillena eo sefuiruitimaci.

<sup>24</sup> Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. <sup>25</sup> Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiaí raise jainide.

<sup>26</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

<sup>27</sup> Naimacimo eruaiñlanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro dinena llote:



—O llua isoi jai finodicaí. Nana cai rana fainonocaida, o diga jai jaicabidicaí.

<sup>29</sup> Jesús uai ote:

—Uanaicino lloiticue. Cuen a naimie isiruillamona, cue rafuena naimie lluamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, <sup>30</sup> Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuai, ie eitiai, ie uruiái, ie enirue birui iite. Monamo naimie ico caimare iocire jaca iite. <sup>31</sup> Birui damierimo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci Jiainomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

*Jesús ie fiodaillena dane llua rafue*

*(Mt 20.17-19; Lc 18.31-34)*

<sup>32</sup> Jerusalémo nia jaillanona, Jesús uicodo jaide. Nainomo naimie jaciruñeno jaillamona, ie llofueoicaigano rajicaidimaci. Naimaci diga jaidino jaciruiocaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

<sup>33</sup> —Ero, Jerusalémo jai jaidicaí. Monamona bilanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuaiñedino illaicominimo cuena fecaitimaci. <sup>34</sup> Cueri jifanoitimaci. Cuen tuallaitimaci. Cuen faitimaci. Cuen meineitimaci; iadedi cue fiodailla mei, darui amani illanona, jilloiticue —llote.

*Jesús* dine Jacobo Juan iaimaiai billa rafue  
(Mt 20.20-28)

<sup>35</sup> Naie facaise Jesús dine Jacobo, Juan diga bitiiaimaiai.  
Iaimaiai moodi Zebedeo. Raitiiaimaiai:

—Omo coco jicalle rafue cocoena finuana jitaidicoco.

<sup>36</sup> Jesús uai ote:

—¿Nie isoide rafuena jitaidomico?

<sup>37</sup> Uai otiiaimaiai:

—Illaimana o jailla mei, o ecimo coco illena o lluaana  
jitaidicoco. Damie o nabeimo. Jiaimie o jarifebeimo. —  
Jiaino afemo iaimaiai illena, iese llotiiaimaiai.

<sup>38</sup> Jesús dinena llote:

—Omico jicanuana raise uiñoñedomico. Cue eo duere  
sefuiticue. Llegi cacaiticue. ¿Ie isoi duere sefuiac-  
cadomico? ¿Ie isoi llegi cacaiacadomico?

<sup>39</sup> Uai otiiaimaiai:

—Jii. Sefuiacadomico.

Jesús dinena raite:

—Cue isoi duere sefuitomico. Llegi cacaitomico;  
<sup>40</sup> iadedi cue nabeimo omico illena, cue jarifebeimo omico  
illena itatanidicue. Naie illano jai cue Moo finoca, nain-  
omo iitino iena.

<sup>41</sup> Iena jiaie llofueoicaigano cacajano, naie iaimaiairi  
iciritimaci. <sup>42</sup> Jesús nana naimacina uaiduanona, raite:

—Nana illaicomini naimaci anamo itinona  
ocuicabidimaci; <sup>43</sup> iadedi omoi dine iese iñena. Omoimona  
bu imiēna iacania, omoi mullaimana naimie jaisoillasa.

<sup>44</sup> Omoimona bu imiēna iacania, omoina naimie canocana  
jaisoillasa. <sup>45</sup> Cuemona fueo. Biñedicue, cominina cue  
ocuillena; iadedi cominina canuaibidicue. Cue jitailla  
jira, nana comini facaina fiodaisaibiticue. Naimaci  
jeacinomona naimaci jillobillena, fiodaisaibiticue.  
Ailluena comini cuena inuamona, jilloitimaci. Coninina  
omoi canua —llote.

*Jesúdi* Bartimeona jillotaja rafue

(Mt 20.29-34; Lc 18.35-43)

<sup>46</sup> Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisunidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena.

<sup>47</sup> Nazaret ie Jesús jaillana naimie cacajano, ado cuirioide:

—David micori Jitona o illamona, Jusiñamuimona o billa jira, cuena duenai. Cuena cano.

<sup>48</sup> Naimie lliicaillena, Jesús diga jaidino naimiena lletade; iadedi eo cuirioide:

—Maestro, David micori Jitona o illamona, cuena duenai.

<sup>49</sup> Naimiena cacajano, Jesús naidadajanona, llote:

—Naimiena cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

<sup>50</sup> Iena cacajano, ie emodomo itiroina duiñuanona, raire naidacaida, Jesús dine bite. <sup>51</sup> Naimiemo Jesús jicanote:

—¿Niese ona cue nibaiana jitaideo?

Uai ote:

—Maestro, cioacadicue.

<sup>52</sup> Jesús dinena uai ote:

—Cuena o inua jira, jai jillodio. Mai jai. —Ieconí naimie jai cide. Jesús diga jaidino diga naimie jiai jaide.

## 11

*Jesús illa*ima isoi Jerusalémo jailla rafue

(Mt 21.1-11; Lc 19.28-40; Jn 12.12-19)

<sup>1</sup> Oni jaillanona, Jerusalémo iaireicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai

iaimaiai ite. Ie llofueoicaiganomona Jesús menamiena orede. <sup>2</sup> Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. <sup>3</sup> Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaita llote”.

<sup>4</sup> Naimie llua isoi, jaidiiaimaiai. Naisomo jofu nasemo burritona baillanona, iena suiñodiiaimaiai. <sup>5</sup> Ie facaise nainomo itino jicanote:

—¿Bue ñellena burritona suiñodomico?

<sup>6</sup> Jesús llua isoi uai otiaimaiai. Ie muidona:

—Jee —raitimaci.

<sup>7</sup> Burritona atidiaimaiai. Ie emodomo naimie llofueoicaigano naimaci iniroi jobianona, ie emodomo Jesús rainadate. <sup>8</sup> Naimiena iobitallena, illaima isoi naimie jaillena, diga comini, imaci iniroi diga, naiso motomo jobedimaci. Jiaino nai fuemona raforona uanona, naiso motomo jobedimaci. <sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraïma billa! Jusiñamui mamecido bitimie eo mare. <sup>10</sup> Cai illaima David micori ifomo caina sedallena, damie billemo birui ocuridicai. Jusiñamui caina jilloitajasa.

<sup>11</sup> Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

*Jesús higuera railla riarana faidua rafue  
(Mt 21.18-19)*

<sup>12</sup> Ie areruido Betaniamona Jerusalémo abido ie llofueoicaigano diga Jesús bia, aimetaite. <sup>13</sup> Arena higuera railla riarana cianona, iena jibuide. Como firuide; ia naie

llisilladi iñede. Ie llisilla facaise nia iñede. <sup>14</sup> Ie jira naie riarana llote:

—Biemona jaca llisiñeite. —Ie llofueoicaigano naimie lluaana cacadimaci.

*Jesúdi* Jusiñamui jofomona damieriena dotaja rafue  
(Mt 21.12-17; Lc 19.45-48; Jn 2.13-22)

<sup>15</sup> Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaiana fecallena, naimiemo toica llaudaiaiana fecallena, nainomo comini jaisoidimaci. Naie cominina ibatajanona, ofomaiaiana, toica llaudaiaia diga, damierie fecauidimaci. Iena Jesús ciuanona, naimici mesaiaiana oni caicode. Ucugina fecauidino rairacuai jiaí oni caicode. <sup>16</sup> Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. <sup>17</sup> Naimacina llofueite:

—Ie facaina lloraíma micori Jusiñamui llogacino jaie cueba: “Cue jofo ite, nainomo nana comini cuemo jillena” cueba. Ero, ailluena omoi ibataja jira, naimie jofona firiruidino jofona omoi finoca.

<sup>18</sup> Judíuai illaicomini naimie finoca rafuena fidiana, naimiena meinellena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillamona, naimiena nia meinenidimaci. <sup>19</sup> Nairui navuida ie llofueoicaigano diga, Jerusalémona Jesús oni jaide.

*Jesús faidoca riaru duilla rafue*  
(Mt 21.20-22)

<sup>20</sup> Ie are ie llofueoicaigano diga, Jerusalén dine Jesús jaillanona, higuera railla riaru duillana cioidimaci. Nana ie jainao diga duillana cioidimaci. <sup>21</sup> Jesús navui are lluaana Pedro uibiñuanona, naimiemo llote:

—Maestro, ero. O faidoca higuera jai duide.

<sup>22</sup> Jesús uai ote:

—Jusiñamuina ñinocana jai. <sup>23</sup> Uanaicinona omoïmo lloiticue. Jusiñamui llwana raise bu ñinoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaillera rana finoite. <sup>24</sup> Nie isoide rafue Jusiñamuimo omoï jicajia, naimie iena finuana omoï ñinuamona, iena naimie finoite. <sup>25</sup> Jusiñamuimo o jiiacania, jiaimie diga o rafue ia iena feita. Ie isoi cai Moo Jusiñamui omoïmo ite jeacino jiai feitaite; <sup>26</sup> iadedi jiaie comini finoca jeacinona omoï feitañenia, omoï Moo Jusiñamui omoï jeacinona feitañeite. Iena oni dotañeite.

*Jesúdi* ie siño uaina llua rafue

(Mt 21.23-27; Lc 20.1-8)

<sup>27</sup> Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamac. Dïese billanona, <sup>28</sup> jicanotimaci:

—¿Nie isoide uaido o finoca rafuena finodio? ¿Bu omoïga uai diga o finoca rafuena finodio?

<sup>29</sup> Jesús dinena uai ote:

—Omoïmo daje rafuena nano jicanoiticue. Raise omoï fairioia, omoïmo cue uaido cue finoca rafuena lloiticue. <sup>30</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

<sup>31</sup> Dani coniniri iena siaduanona, anado raitimaci:

—“Jusiñamui” cai fairioia, caïmo jicanoite: “¿Bue ñelena naimie micori llwana ñinoñedomoi?” <sup>32</sup> “Comini” cai fairioia, bene itino caina nibai meineitimaci, Juan micoridi Jusiñamui facaina lloraïma naimaci raila jira.

<sup>33</sup> Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

## 12

*Jesúdi maraiñede maijiraini rafuena llua rafue  
(Mt 21.33-46; Lc 20.9-19)*

<sup>1</sup> Judíuái illaicomínimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiáiruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie eniruemo jaide. <sup>2</sup> Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riará llisilla ollena; <sup>3</sup> iadedi naie sedarainidi ie mullaimana fatimaci. Ie mei naimiemo riará fecañeno naimiema abido oredimaci. <sup>4</sup> Ie mei patrón jiaie mullaimana orede. Naimie ifogina bofedimaci. Naimiema jeare finodimaci. <sup>5</sup> Ie mei patrón jiaimiena orede. Naimiema meinetimaci. Ie mei ailluena mullaiana orede. Damieriema fatimaci. Damieriema meinetimaci. <sup>6</sup> Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiema oretaiticue” patrón comecina facade. <sup>7</sup> Riaraiaina sedaraini naimiema ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci. <sup>8</sup> Naimaci dine naimie rilla mei, naimiema meinetimaci. Ie mei ie abina illimona jino dotadimaci. <sup>9</sup> Iena fidia mei, ¿niese naie patrón ñbaiite? Ero, naimie billanona, ie illina sedarainina fuidoite. Ie mei jiainona ie illina sedataite.

<sup>10-11</sup> Naimacimo Jesús llote:

—Naie illi sedaraini isidomoi. Jusiñamui facaina lloraima micori omoina jaie cuete. Ie cuegafuena raise facañedomoi. Naimie micori cuega: Jofo finoraini jitaiñena noficidi nana naie jofomo ite nofici baifemo jai uaide.

Jusiñamui iena finotate. Iena cai uiñuamona: “Eo mare” raiticai cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isidomoi. Naie nofici isidicue. Cue rafuena omoi jitaiñena jira, naimie cominina jaiñeitomoi.

<sup>12</sup> Judíuai illaicomini iena cacajanona, Jesús naimacina ñaiana naimaci uiñuamona, naimiena gaitacadimaci; ia cominina jaciruitimaci. Ie jira naimiemona oni jaidimaci.

*Jesúmo gobiernomo ucubena fecajana jicanua rafue*  
(Mt 22.15-22; Lc 20.20-26)

<sup>13</sup> Judíuai illaicomini jailla mei, dajerie fariseuai cominina Jesús dine oredimaci. Illaima Herodes dibeimo itinona oredimaci. Naimie raise uai oñenia, naimiena duere finollena, Jesúsna facaciacadimaci. <sup>14-15</sup> Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai raila nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:



—¿Bue ñellena cuena facacitomoí? Ucube cuemo acata.

<sup>16</sup> Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiáide bie cuega radi?

Uai otimaci:

—César.

<sup>17</sup> Jesús ñinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaa cacajano, naimie raise uai ua jira, ieri rajjicaidimaci. Naimie iese llua jira, naimiena duere finonidimaci.

*Jesús ñine saduceuai railla comini billa rafue*

*(Mt 22.23-33; Lc 20.27-40)*

<sup>18</sup> Naie facaise saduceuai railla comini naimie ñine bitimaci. Fiodaillamona jaca buna jilloñellena ñnotimaci. Jesúmo llotimaci:

<sup>19</sup> —Maestro, cai facaina Moisés micori jaie cuega: “ñima fiodailla meinoconi, naimie urue ññena, ie ama naie feciño olle. Naimiedi uruiaina ie ama facaina comuitaite” cuega. <sup>20</sup> Bie rafuena uiñoiacadicaí. Siete amatiaí ite. Nano doforamie ie aina ote. Naimie ñia uruiainide fiodailla. <sup>21</sup> Ie emodo imie ie ama feciñona ote. Naimie uruiainide jiaí fiodailla. Naie siete ñigamiedemona iese sefuide. <sup>22</sup> Uruiaínide nana fiodailla. Ja muidomo naie riño jiaí fiodaite. <sup>23</sup> Fiodaillamona, íco naimaci jilloiadedi, ¿bu naie riño ienite? Naiñaiño siete ñigamiena ñinrede —llotimaci.

<sup>24</sup> Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. <sup>25</sup> Fiodaillamona jillua mei, Jusiñamui ñiga ite comini ainitimaci. ñninitimaci. Monamo Jusiñamui jaíenisai aínidimaci. ñninidimaci. Ie isoi

naie siete amatiai iitimaci. <sup>26</sup> Fiodaitino ico jilloillena omoimo lloiticue. Moisés micorí jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui lloite: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” lloite. <sup>27</sup> Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Fiodaillamona jilluana omoi raise uiñoñedomoi —lloite.

*Jesús nanoca llogacinona llofuia rafue*  
(Mt 22.34-40)

<sup>28</sup> Naie facaise Moisés micorí llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micorí jaiie llogacinuaimona, ¿nie llogacino ua nanoca llogacinona?

<sup>29</sup> Jesús dinena uai ote:

—Moisés micorí jaiie cuega: “Israel comini, bie rafuemo cacarei. Cai Nama Jusiñamui jaca dajede. <sup>30</sup> Omoi jitailla jira, nana omoi comeciai diga, cai Nama Jusiñamuina isirui. Naimiemo omoi comeciaina eo faca”. <sup>31</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

<sup>32</sup> Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. <sup>33</sup> Cai jitailla jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicaia. Bie rafuedo naimiemo toica

ocaina fecajana baifemo faite. Bie rafuedi naimiemo cai ra fecajana baifemo faite.

<sup>34</sup> Naimie raise uai ua jira, naimiemo Jesús lloste:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

*Jesús* dinena fariseuai cominimo jicanua rafue

(Mt 22.41-46; Lc 20.41-44)

<sup>35</sup> Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci?

<sup>36</sup> Jusiñamui Joreñodi David micorina ñaitatajanona, David micori lloste:

Jusiñamuidi cue Namamo lloste: “Illaimana o illamona, cue nabei dine ana rai.

Ona inoñedino o anamo itataiticue”.

<sup>37</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. — Nainomo itino naimie llofuiana iocire cacareidimaci.

*Jesúdi* judíuai illaicominina ñaia rafue

(Mt 23.1-36; Lc 11.37-54; 20.45-47)

<sup>38</sup> Jusiñamui jofomo Jesús nia llofuianona, raite:

—Moisés micori llogacinona llofuerainimona abina rairui. Illaicominina naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedinona itimaciden, comini naimacina uaiduana gaidimaci.

<sup>39</sup> Comini naimacimo acarillena, ofiracomo uicomo raiacadimaci. Rafue ia: “Jamai bue isoñedicai” raillamo comecina facajanona, rafue nama ecimo raiacadimaci.

<sup>40</sup> Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo

are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

*Jesúdi* Jusiñamui jofomo duerede feciño ucube fecajana ciua rafue

(Lc 21.1-4)

<sup>41</sup> Jusiñamui jofomo Jesús nia ia, ucube fecarano uicomo ana raide. Nainomo comini ucubena joni-amo eruaide. Ailluena ucuberedino ailluena ucubena jonetimaci. <sup>42</sup> Ie facaise eo duerede feciño menaruñu jonete. <sup>43</sup> Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete. <sup>44</sup> Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñomo ite ucubena jonete. Ie jira jiaino baifemo jonete.

## 13

*Jesúdi* Jerusalémo ite Jusiñamui jofo judaiana llua rafue

(Mt 24.1-2; Lc 21.5-6)

<sup>1</sup> Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiái co ebirede. Bico eo ebire ciode.

<sup>2</sup> Jesús dinena uai ote:

—Bie jofo birui eo mare; ia nana bie jofomo ite noficiái ico judaisite —llote.

<sup>3</sup> Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

<sup>4</sup> —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>5</sup> Uai ote:

—Omoína bie rafuena bu jifueñellena, omoi abina rairui. <sup>6</sup> Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. <sup>7</sup> Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. <sup>8</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini aime guitimaci. Iese suia, omoi duere sefuillifue omoimo suite. <sup>9</sup> Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitomoi. <sup>10</sup> Diga comini cue rafuena nana nairaimo lloitimaci, nana nairaiái iena cacaillena. Ie mei abido biiticue. <sup>11</sup> Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uiñoitomoi. Dani omoi comeciái icinodo ñañeítomoi; ia Jusiñamui Joreño uaido ñaitomoi. <sup>12</sup> Cuená ñnotomoi; ia ailluena cuena ñnoñeítimaci. Cuená omoi ñnua jira, omoína enoitimaci. Iemona dajerie ie amana meinetalena, naimiána llogidoite. Dajerie moodi ie uruena meinetalena, naimiána llogidoite. Dajerie uruiáidi naimaci moona, naimaci eina meinetalena, naimacína llogidoítimaci. <sup>13</sup> Cue cominina omoi illamona, nana nairai omoína enoitimaci; iadedi cuena fainonocaiñedimie ja muidomo monamo jaca iite. Naimiána jillotaiticue. <sup>14</sup> Cue lluomo cacarei. Jusiñamui facaina lloraimadi jiaimie jearede rafue finollena jiaie

llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoi ciuanona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. <sup>15</sup> Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. <sup>16</sup> Aneduai dine raire rillena, illimo omoi ia, abido jofomo biñeno, omoi iniroi omoi diga uillena. <sup>17</sup> Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. <sup>18</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena. <sup>19</sup> Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñeditimaci. Ico iese eo duere sefuiñeitimaci. <sup>20</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>21</sup> 'Ie facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena iñoñoeno, Jiaimie raia: "Oni batine Cristo birui bairede", iena iñoñoeno. <sup>22</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>23</sup> Ie jira omoi abina rairui. Ero, bie rafue nia suiñenia, iena omoimo jai lloticue.

*Jesús* abido ie bille rafue

(Mt 24.29-35, 42-44; Lc 21.25-36)

<sup>24</sup> 'Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. <sup>25</sup> Monamona ucuai ana llujite. Nana naie radi jaidisite. <sup>26</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. <sup>27</sup> Cue jaienisaina cue ecimona oretaiticue. Cue fetocano diese naganomona ofitaitimaci.

<sup>28</sup> 'Higuera railla riaramona omoi fueo. Bie eniruemo naie riar firuillamona, fiemona raire illana uiñotomoi. <sup>29</sup> Ie isoide. Bie rafue ico suia, cue billirui iairei illena uiñoitomoi. <sup>30</sup> Uanaicinona omoimo lloiticue. Nana bie rafue suille facaiseconi bie nairai nia iite. <sup>31</sup> Mona enirue diga fuite; iadedi cue lloga uai jaca suite. <sup>32</sup> Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. <sup>33</sup> Abina rairuicana jai. Naimie omoina canollena, Jusiñamuimo jiai jicabi. Cue billirui omoi uiñoñena jira, iemo ocuiri.

<sup>34</sup> 'Iena omoi raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaiaina ie jofona sedatate. Nagamie ie maijille ocuide. Jofo nasena sedadimiemo naimie billemo raise ocuirillena llote. <sup>35</sup> Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. <sup>36</sup> Ebena naimie biite. Inidimacimo naimaci baisaibi raillanona, naimaci jaca ocuirilla. <sup>37</sup> Ie isoide. Ebena biiticue. Cue abido billirui omoi uiñoñena jira, iemo jaca omoi ocuiri.

## 14

*Judíuai* illaicomini Jesúna gaitallena, siadua rafue  
(Mt 26.1-5; Lc 22.1, 2; Jn 11.45-53)

<sup>1</sup> Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai illaicomini Jesúna jifuiano gaitaacadimaci. Naimiena meineiacadimaci. Iena siadua mei, <sup>2</sup> raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaiticai.

*Jesúmo riño caimare soride ra totaja rafue  
(Mt 26.6-13; Jn 12.1-8)*

<sup>3</sup> Betania railla nairaímo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. <sup>4</sup> Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide. <sup>5</sup> Iena fecacadena, trescientos ucubena feñote. Fecaja mei, naie ucube dueredinomo fecadena, caimona mare. —Naiñaiñoña iese ñaitimaci.

<sup>6</sup> Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñoña jeare ñaitomoi? Mare rafuena cuemo finode. <sup>7</sup> Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. <sup>8</sup> Cue facaina naiñaiñoño finoacana diese jai finode. Nia fioidañedicue; ia cue fioidaillirui facaina naiñaiñoño iese finode. <sup>9</sup> Omoimo uanaicinona lloiticue. Ninomo cue mare finoca rafuena bu lloia, naiñaiñoña ubiñollena, nana cominimo naiñaiñoño finoca rafuena lloite.

*Judas micori raillamie Jesúna gaitataiacana rafue  
(Mt 26.14-16; Lc 22.3-6)*

<sup>10</sup> Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide. <sup>11</sup> Iena cacajano, iobidimaci.

—Iena o finoia, omo ucubena fecaiticai —lloitimaci. Iemona Jesúna gaitatallirui mo Judas ocuiride.



*Jesúdi* ie fiódaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Llomenico guille rafue illanona, judfuaí comini toica llaudaiaína fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

<sup>13</sup> Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. <sup>14</sup> Naimie jailla jofo namamo llono: “Coco llofueraíma cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” <sup>15</sup> Ie mei omicomo afebebamo ite aillue cuartona acataite. Na raruiaí diga ite. Nainomo caí guille fino.

<sup>16</sup> Jesús llua isoi jaidiaímaiaí. Jerusalémo rilla mei, naimie llua isoi baitiaímaiaí. Pascua rafue guille finodiaímaiaí. <sup>17</sup> Nairui jitoma ana itemo, ie llofueoicaigano diga, Jesús nainomo guisaide. <sup>18</sup> Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

<sup>19</sup> Iena cacajanona, sunaitimaci. Damierie naimiemo jicanoside:

—¿Cuena ñaitio?

<sup>20</sup> Uai ote:

—Omoimona damie bie platomo cue diga llomenico diga mutade. <sup>21</sup> Jusiñamui facaina lloraíma micori cuega isoi, monamona jai billamona, fiódaiticue; iadedi cuena gaitataitimie eo duere sefuite. Naimie jeiciñegadena, cuemona mare.

<sup>22</sup> Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

<sup>23</sup> Ie mei naimie jiroracona jiai llinote. Jusiñamuimo iobillacinona llua mei, naie jiroracomu jai totaca vino naimacimo fecade. Iemona nana jirodimaci. <sup>24</sup> Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. <sup>25</sup> Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue.

*Jesúdi Pedro naimiena januana llua rafue  
(Mt 26.30-35; Lc 22.31-34; Jn 13.36-38)*

<sup>26</sup> Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide.

<sup>27</sup> Naimacimo llote:

—Cuena fainonocaitomoi. Jusiñamui facaina lloraima micori iena jaie cuega: “Toica llaudaiai sedaraimana meineticue. Naimie toinai uaficaida jaitimaci” cuega. Naimie micori caina cuete. <sup>28</sup> Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

<sup>29</sup> Pedro uai ote:

—Nana jiaino ona fainonocaia, ona jaca fainonocaiñeiticue.

<sup>30</sup> Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

<sup>31</sup> Pedro dinena riire llote:

—O diga cue fiodaialedi, ona janoñeiticue.

Nana ie llofueoicaigano daje uaido jiai raitimaci.

*Jesúdi* Getsemanímo Jusiñamuimo jïia rafue  
(Mt 26.36-46; Lc 22.39-46)

<sup>32</sup> Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

<sup>33</sup> Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede.

<sup>34</sup> Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

<sup>35</sup> Naimie janore bai jaillanona, eniruemo bitadate. Naimie duere sefuiñellena, Jusiñamuimo jiiide:

<sup>36</sup> —Ore Moo, nana rana finoredio. Cuena llegi caitañeno. Cue jitailla isoi cuena finoñeno; iadedi o jitailla isoi cuena fino.

<sup>37</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

<sup>38</sup> Iniñeno. Taiñe ramo omoína fai raillano, iena omoi iñoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena —llote.

<sup>39</sup> Ie mei dane jiiillena jaide. Ailli naimie jiiia isoi, dane jiiide. <sup>40</sup> Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. <sup>41</sup> Dane jiiia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiodaille facaise jai ite. Jusiñamui jitailla

jira, cuena ja gaitajanona, naimiena iinoñedino anamo ja iiticue. <sup>42</sup> A naidacai. Maiña. Cue gaitataitimie jai bite.

*Jesúna gaitalle rafue*

*(Mt 26.47-56; Lc 22.47-53; Jn 18.2-11)*

<sup>43</sup> Jesús nia ñaitemo, ieconí Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micorí llogacinona llofuerainimona bitimaci. Naimaci einamacimona bitimaci. <sup>44</sup> Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

<sup>45</sup> Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconí naimiena llibanote. <sup>46</sup> Ie jira Jesúna gaitadimaci.

<sup>47</sup> Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaíma jefona jaíbonote. <sup>48</sup> Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa. <sup>49</sup> Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoríai cuega-fuíai suite.

<sup>50</sup> Ie facaise nana naimie llofueoicaigano naimiena fainonocaillano, aisidimaci.

*Jesús jinafona conirue racaja rafue*

<sup>51</sup> Ie facaise daje conirue Jesús jinafona racade. Jamai abimo iniroi ferinocaida racade. Naimiena

ciuanona, comini naimiena gaitadimaci; <sup>52</sup> ia ie iniroina fainonocailanona, taimiena aisode.

*Jesúdi judíuai illaicomini dine illa rafue  
(Mt 26.57-68; Lc 22.54, 55, 63-71; Jn 18.12-14, 19-24)*

<sup>53</sup> Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamací jiaí itimaci. Moisés micori llogacínona llofueraini jiaí itimaci. <sup>54</sup> Pedro naimaci jinafona aarena racade. Jusiñamui diga nanoca ñairaima nairairimo jaide. Jofono sedadino diga nainomo ite iraimo gaide.

<sup>55</sup> Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. <sup>56</sup> Diga comini Jesúna llogidotimaci; ia tainona llotimaci. Daje isoi lloñedimaci. <sup>57</sup> Damierie billanona, tainona llogiduanona, raite:

<sup>58</sup> —Bimie lluaana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci”. <sup>59</sup> —Iese llotimaci; ia daje isoi lloñedimaci.

<sup>60</sup> Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

<sup>61</sup> Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

<sup>62</sup> Jesús uai ote:

—Jii, naimiedicue. Monamona jaie cue billamona, iimana jaidicue; ia ico jairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiaí cioitimaci.

<sup>63</sup> Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitaiñedicaí.

<sup>64</sup> Jusiñamuina naimie jeare ñaiana jai cacadomoí. ¿Niese naimiena raitomoí?

Jiaie illaicomini ñinena:

—Naimie fiódaillesa —lloñimaci.

<sup>65</sup> Ie facaise damierie naimiena tuallaitimaci. Ie uiecona ñbailla mei, naimiena ducoídimaci. Raitimaci:

—Bu o ducoía caimo llono.

Naimiena gaitadino ñinena naimiena jiai ducoídimaci.

*Pedro* ñi Jesúsna janua rafue

(Mt 26.69-75; Lc 22.56-62; Jn 18.15-18, 25-29)

<sup>66</sup> Naie facaise Pedro nairaibirimo ite. Naie nanoca ñairaima mullaíñuaimona dañaiño nainomo billanona,

<sup>67</sup> Pedro agaillana ciode. Raite:

—Nazaret ie Jesús cominidio.

<sup>68</sup> Pedro iena januano, raite:

—O lluana uiñoñedicue. Iena raise cacaiñedicue.

Ie mei nase fuedo jaide. Naie facaise iitava dacaiño ñaite. <sup>69</sup> Naie mullaíño naimiena dane ciuanona, nainomo jamai itinomo llote:

—Bimiédi Jesús ie llofueoicaigano imie.

<sup>70</sup> Iena Pedro dane janote. Dallu illanona, nainomo jamai itino Pedromo llote:

—Odi Galilea imiedío. Jesús ñiga jaicabidio.

<sup>71</sup> Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñoñote. Ero, omoi llogamienna uiñoñedicue.

<sup>72</sup> Ieconí iitava dane ñaite. Iena cacajano, Pedro Jesús lluana ubiñoñote. Jaive ñaio Jesús Pedromo llote: “ñitava menacaiño ñia ñaíñenia, dacaiño amani cuena janoitio”. Iena ubiñoñuamona, Pedro eo eede.

## 15

*Pilato* dine Jesús illa rafue  
(Mt 27.1, 2, 11-14; Lc 23.1-5; Jn 18.28-38)

<sup>1</sup> Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. <sup>2</sup> Pilato naimiemo jicanote:

—¿Judíuai comini illaimadio?

Jesús uai ote:

—Jii.

<sup>3</sup> Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

<sup>4</sup> Pilato dinena naimiemo jicanote:

—¿Ñiese uai oñedio? Ona eo llogidotimaci.

<sup>5</sup> Jesús nia uai oñena jira, Pilato uainicaide.

*Pilatodi* Jesús fiodaillana llua rafue  
(Mt 27.15-31; Lc 23.13-25; Jn 18.38-19.16)

<sup>6</sup> Naga año pascua railla rafue facaiseconi cárcelmo itinomona Pilatodi comini jicacamiena jamai jino orede.

<sup>7</sup> Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. <sup>8</sup> Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci.

<sup>9</sup> Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

<sup>10</sup> Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meini-acanana jiaí uiñote. <sup>11</sup> Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. <sup>12</sup> Iena cacajano, Pilato naimacimo jicanote:

—¿Niese bimiena cue finuana jitaídomoi? Naimiedi omoi judíuai illaíma raillamie.

<sup>13</sup> Ado llotimaci:

—¡Naimiena coraí!

<sup>14</sup> Pilato dane jicanote:

—¿Nie isoide marañede rafuena finode? —Iena cacajano, ado ibi llonoidimaci:

—¡Naimiena coraí!

<sup>15</sup> Naimacina iobitallena, naimaci jitaílla jira, Barrabás jino orede; iadedi Jesúna sechedotaja mei, naimiena coraíllena orede.

<sup>16</sup> Soldaduai naimiena gobernador jofo fo uillanona, nana soldaduai nainomo ofidimaci. <sup>17</sup> Jiduirede iniroi naimiemo jítadimaci. Ecuaimona niga nuiciraina naimie ifogimo jítadimaci. <sup>18</sup> Naimiena jífanoduanona, naimiena uaidotimaci:

—¡Jadí, judíuai illaíma!

<sup>19</sup> Radosi diga ie ifogimo buta-butadimaci. Naimiena tuallaítimaci. Naimie illaímana itena, naimiena sedallena, caíñici ifodo raiedimaci. <sup>20</sup> Jesúna naimaci jífanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraíllena oni uitimaci.

*Jesúna coraía rafue*

*(Mt 27.32-44; Lc 23.26-43; Jn 19.17-27)*

<sup>21</sup> Jerusalémona naimaci jaíllanona, jamai bitimiemo dafaífidimaci. Naimiedi Simón. Cirene raílla enirue imie. Naimie jito íaímaíaidi Alejandro íaímaíai Rufo



diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna rocatatimaci. <sup>22</sup> Gólgota raillanomo jaidimaci. Ifocoraina eruaila jira, iese mameciredede. <sup>23</sup> Nainomo rillanona, ie abi isirena cacaiñellena, vinomo eriredede rana faianona, Jesúmo fecadimaci; iadedi naimie iena jiroñede. <sup>24</sup> Ie mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci.

<sup>25</sup> Jitoma nia furi daidemo, naimiena coraidimaci. <sup>26</sup> Cruzmo ie llogiduafeua jonetimaci. Jai cuega: “Judúuai comini Illaíma”. <sup>27</sup> Ie mei mena fiiriruide iaímaiaina coraidimaci. Damie Jesús nabeimo coraica. Jiaímie Jesús jarifebeimo coraica. <sup>28</sup> Iemona Jusiñamui facaina lloraíma micori jaie cuegafue suide. Cuega: “Maraiñedino isoi naimie jai ite”.

<sup>29</sup> Naisodo jamai jaidino Jesúna mameritimaci. Mamerillamona, ifogiaina jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. <sup>30</sup> Ie muidona dama o abina mai jillota. Cruzmona ana bi.

<sup>31</sup> Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. <sup>32</sup> Naimiedi Cristodena, naimiedi cai judúuai comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. — Iese naimiena jifanododimaci. Naimie diga coraicamie iaímaia naimiena jiai jeare ñaitiaímaiaí.

*Jesús fiodailla rafue*

*(Mt 27.45-56; Lc 23.44-49; Jn 19.28-30)*

<sup>33</sup> Jitoma naidai itemona, daje amani horas mona jitibicaide. <sup>34</sup> Ie meinomo judúuai railla uaido Jesús ado jidaioides:

—Eloi, Eloi, ¿lama, sabactani? —jidaioides. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

<sup>35</sup> Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci. <sup>36</sup> Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiema jillotajaibillena uiñoiacadicai.

<sup>37</sup> Ie facaise ado cuirioita fiodaite. <sup>38</sup> Naie facaise Jusiñamui jofomo ie fetaca ñiroife ana anaba jillacimo motodo menafe cuararide. <sup>39</sup> Jesúsna sedallena, nainomo capitán ite. Jesúsno eruailanona, Jesús fiodaillana ciode. Raite:

—Uanai bimiedi Jusiñamui Jito.

<sup>40</sup> Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. <sup>41</sup> Galileamo Jesús navui illa facaise naie riñoniai naimie diga jaisoidimaci. Naimiema canouidimaci. Jerusalémo Jesús billanona, ail-luena riñoniai naimie diga jiai bitimaci. Ie fiodaillana jiai cioidimaci.

*Jesús raiafomo jonia rafue*

*(Mt 27.57-61; Lc 23.50-56; Jn 19.38-42)*

<sup>42</sup> Jitoma ana itemo, sábado rille jai iairei illanona, <sup>43</sup> Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuiride. Ie comecina

ocuiñocaida, Pilato ðine jaide. Iena raillena, Jesús abina jicade. <sup>44</sup> Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

<sup>45</sup> —Jesús jai fiodaite —capitán railla mei, Pilato Jesús abina Josémo fecallena llote. <sup>46</sup> José mare userede iniroi ìbaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ìbaillena, aillue nofici nainomo bai ñuitade. <sup>47</sup> María Magdalena, jiaie María diga, naimie raiana ciode. María José ei.

## 16

*Jesús fiodaillamona jillua rafue*

*(Mt 28.1-10; Lc 24.1-12; Jn 20.1-10)*

<sup>1</sup> Sábadoruimo jitoma sojicaidemo, María Magdalena caimare soride rana ìbade. Jacobo ei, María jiai ìbade. Salomé jiai ìbade. Jesús abimo jonellena, ie abina raise finollena naimaci einamaci finocabilla isoi, naiñaiñuai iena ìbade. <sup>2</sup> Domingo jitiramo jitoma como bairedemo, Jesús raiafo ðine naiñaiñuai jaide.

<sup>3</sup> Jaillanona, coniuaimo jicanote:

—¿Bu noficina caina oni ñuitalle raiafomona?

<sup>4</sup> Raiafo ðine rillanona, iemo eruailanona, nofici oni ñuitacana ciode. Naie nofici eo aillue. <sup>5</sup> Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jitade. Naimiedi Jusiñamui jaienici. Naiñaiñuai jacinaite.

<sup>6</sup> Nainomo itimie ðinena raite:

—Jacinañeno. Nazaret ie Jesúna jenodomoì. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda. <sup>7</sup> Naimie llofueoicaiganomo iena lluai. Ua Pedromo llono. Galileamo

omoï uicomo naimie jaite. Omoïmo naimie llua isoi, naimiena cioitomoï.

<sup>8</sup> Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumo lloñede.

*Jesús María Magdalenamo bairia rafue*

*(Jn 20.11-18)*

<sup>9</sup> Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede. <sup>10</sup> Naiñaiñomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

<sup>11</sup> —Naimie jai jillode. Naimiena jai ciodicue — naimacimo naiñaiño llua mei, iena ñnoñedimaci.

*Mena llofueoicaiganomo Jesús bairia rafue*

*(Lc 24.13-35)*

<sup>12</sup> Ie meinoconi Jesús mena llofueoicaiganomo bairede. Naimie eruaisoilla isoi, eruaiñede. Iaimaiai naisomo macaria, iaimaiaimo bairede. <sup>13</sup> Jerusalémo abido iaimaiai rilla mei, jiaie llofueoicaiganomo iena llotiaimaiai; ia ñnoñedimaci.

*Jesús ie once llofueoicaiganomo bairia rafue*

*(Mt 28.16-20; Lc 24.36-49; Jn 20.19-23)*

<sup>14</sup> Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote. <sup>15</sup> Naimacimo llote:

—Nana nairaiaimo jai. Nana cominimo cue mare rafue llocana jai. <sup>16</sup> Cuen a ñnuamona, bautizagano diese Jusiñamuimona duere sefuiñeitimaci; iadedi Jusiñamui cuena ñnoñedinona duere finoite. <sup>17</sup> Cuen a ñnotino Janaba

anamo itinomona Janabana oni oretaitimaci. Naimaci nia uiñoñega uaido ñaitimaci. <sup>18</sup> Jaiona naimaci linoia, naimacina niese níbañeite. Bainode ra naimaci jiroia, naimacina niese níbañeite. Duidinona naimaci jetajamona, jilloitimaci.

*Jesús monamo jailla rafue*

*(Lc 24.50-53)*

<sup>19</sup> Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. <sup>20</sup> Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue ciega rafue jai fuite. Marcodicue.

**Jusiñamui uai: Jusiñamui jito rafue illa rabenico**  
**New Testament in Huitoto, Murui (PE:huu:Huitoto, Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 28 May 2022

145a1f66-dca1-5de3-9c00-4e533605e488